

गुजरात-हिमाचल-चुनाव परिणाम

गुजरात अउ हिमाचल प्रदेश विधानसभा चुनई के मतगणना म मिले रूझान अउ परिणाम ले साफ होंगे हे कि दूनों राज्य म भारतीय जनता पार्टी के सरकार बनइया हे।

समाचार लिखे जाय तक एक सौ बयासी सीट वाले गुजरात विधानसभा म नियान्नवे सीट भाजपा ल मिले हे त उहें कांग्रेस ल अस्सी सीट मिले हे अउ तीन सीट म अन्य मन ह बढ़त बनाय हे। अब तक मिले रूझान के मुताबिक हिमाचल प्रदेश म अड़सठ विधानसभा म चौवालीस सीट म भाजपा अउ इक्कीस सीट म कांग्रेस के संग तीन सीट म अन्य दल आगू हावय।

मुख्यमंत्री डॉक्टर रमन सिंह ह गुजरात अउ हिमाचल प्रदेश विधानसभा म मिले स्पस्ट बहुमत उपर खुसी जताईन हे। ओमन किहीन कि प्रधानमंत्री नरेन्द्र मोदी के जन-कल्याणकारी योजना अउ बिकास के सेती ए दूनों राज्य म जीत मिले हे।

विधानसभा सत्र

छत्तीसगढ़ विधानसभा के सीतकालीन सत्र काली ले सुरु होवत हे। ए सत्र बाईस दिसंबर तक चलही। सत्र के दउरान चार बइठका होही। ए सत्र म सरकार डहार ले तीसर अनुपूरक बजट पारित करे के संगेसंग पांच ठिन संसोधन विधेयक घलो लाय जा सकत हे। उहें, विपक्ष डहार ले सत्र के दउरान सूखा राहत, धान खरीदी, धान बोनस जइसन मुद्दा उपर सरकार ल घेरे के तियारी हे।

ऐति, कांग्रेस के प्रदेश अध्यक्ष भूपेश बघेल ह सत्र के बेरा ल कमती करे के मामला उठावत किहीन कि नेता प्रतिपक्ष ह सत्र के अधिसूचना जारी होय के पहिलीच चिट्ठी लिखके कम ले कम दस बइठका के सत्र बुलाय के बिनति करे रिहीन।

भिलाई-शव बरामद

दुर्ग जिला के भिलाई म आज एक ठिन घर ले चार झिन लोगन के शव बरामद करे गीस। परिवार के मुखिया के लास ह फांसी के फंदा म झूले मिलीस। उहें, परिवार के बांचे सदस्य मन के लास ह घलो घरे म मिले हे। घटना के सूचना के बाद पुलिस दल मउका म पहुंच के जांच-पड़ताल सुरु कर देहे।

नगर पुलिस अधीक्षक अजीत यादव ह बतईन कि पहिली जांच म अइसे लगत हे कि परिवार के मुखिया ह अपन गोसाईन अउ लइका मनके हत्या करके खुदे आत्महत्या कर लेहे। पुलिस के मुताबिक एक ठिन सुसाइड नोट घलो मिले हे। जेमा कोनो ल परेसान नइ करे बात केहे गेहे।

हाथी-आतंक

रायगढ़ जिला के ठाकुरपोड़ी गांव म आज हाथी के हमला म दू झिन माईलोगिन के मउत होंगे। उहें, एक झिन माईलोगिन गंभीर रूप ले घायल होंगे।

हमर संवाददाता के मुताबिक आज बिहनिया तीनों माईलोगिन मन सौच बर गे रिहीन। इही दउरान हाथी मन ह इंखर मन उपर हमला कर दीन। घायल महिला के इलाज रायगढ़ अस्पताल म चलत हे। घटना के जानबा मिलतेच वन विभाग के कमरचारी मन हाथी मन ल भगा दीन।

जानबा के मुताबिक हाथी मनके दल ह जशपुर, रायगढ़ अउ सरगुजा के जघा मन म अब्बड़ दिन ले घुमत हे अउ ए जघा मन म फसल मन ल घलो नकसान पहुंचावत हे।

माओवादी-गिरफ्तार

दंतेवाड़ा जिला म आज सुरक्षा बल मन ह पाईप बम के संग दू झिन माओवादी मन ल पकड़े हे। हमर संवाददाता ले मिले जानबा के मुताबिक ए माओवादी मन ल जिला के अरनपुर थाना क्षेत्र के पालनार के तीर ले गिरफ्तार करे गेहे। इंखर तीर ले पाईप बम के संगेसंग हथियार घलो बरामद करे गेहे।

उहें, बीजापुर जिला ले घलो पुलिस ह एक झिन वारंटी माओवादी ल गिरफ्तार करे हे।

घासीदास-जयंती

सतनाम पंथ के प्रवर्तक गुरु घासीदास बाबा के जयंती आज प्रदेशभर म उछाह के संग मनाय जात हे। ए मउका म बाबा के मनइया अनुयायी मन डहार ले सोभायात्रा निकाले गीस। संगेसंग जैतखाम म पूजापाठ करके पालो चढाय गीस। उहें, कतकोन जघा म सांस्कृतिक कारीकरम अउ पंथी नृत्य चलत हे।

प्रमुख आयोजन बलौदाबाजार जिला के गिरौदपुरी धाम म चलत हे। ए कारीकरम म सतनाम पंथ के धर्मगुरु विजय गुरु परिवार के संग राज महंतों के उपस्थिति म छाता पहाड़ स्थित जैतखाम के पूजा-पाठ करीन। ए मउका म प्रदेशभर ले आय श्रद्धालु मनके भीड़ देखे जात हे।

राजनांदगांव-चोरी

राजनांदगांव पुलिस ह अंतर्राज्यीय चोर गिरोह के नौ झिन सदस्य मन ल पकड़े हे। ए गिरोह मन ह जिलाभर म चौदह जघा चोरी करे हे।

राजनांदगांव क्राइम ब्रांच के टीम ह इंखर मन तीर ले चालीस तोला सोना, आठ किलो चांदी, दू नग मोबाईल अउ तीन टिन फटफटी के संगेसंग बीस लाख रुपिया के जिनीस बरामद करे हे। पुलिस ह बतईन कि गिरोह के सरगना नागपुर, दुरुग अउ रईपुर के जेल मन म तेरा साल रइ चुके हे।

यूथ स्पार्क

राज्य सरकार के कल्याणकारी योजना ले लोगन मन ल जागरूक करे बर बाईस दिसंबर ले “यूथ स्पार्क” प्रतियोगिता के आयोजन करे जात हे। ए प्रतियोगिता पांच चरण म आठ जनवरी दू हजार अठारा तक चलही।

मुख्यमंत्री डॉक्टर रमन सिंह ह आज “यूथ स्पार्क खेलेगा छत्तीसगढ़-जीतेगा छत्तीसगढ़” प्रतियोगिता के पोस्टर के अनावरण करीन। ए प्रतियोगिता म प्रदेश के सात सौ बयालीस कालेज मनके करीबन पांच लाख युवा मन भाग लीहीं। प्रतियोगिता के पांचवां अउ आखिरी पारी म पहिली स्थान म अवइया युवा ल इंक्यावन हजार रुपिया, दूसर स्थान वाले युवा ल इकतीस हजार रुपिया अउ तीसर जघा बनइया युवा ल इक्कीस हजार रुपिया के इनाम दे जाही।